

Q. D. B. V.  
DISPUTATIO  
INAUGURALIS MEDICA  
DB

# EMANSIONE MENSIVM PRÆ- TERNATURALI,

QVAM  
CONSENSU & AUTORITATE  
GRATIOSISSIMÆ FACULTATIS MEDICÆ  
IN ACADEMIA ELECTORALI ERFFURTENSI  
SUB PRÆSIDIO  
SPECTABILIS, AMPLISSIMI atq; EXCELLENTISSIMI  
VIRI,

## DN. ECCARDI LEICHNERI,

Medicinæ D. P. P. Academiæ Senioris meritissimi,  
Facultatis suæ p. t. Decani & Civitatis Erffur-  
tensis Physici Ordinarii,

*Dn. Præceptoris, Patroni & studiorum suorum Promotoris quovis  
honoris atque observantiae cultu ad urnam co-  
lendi atque devenerandi,*

### PRO LICENTIA

SUMMOS IN ARTE MEDICA HONORES & PRIVI-  
LEGIA DOCTORALIA consequendi  
Publico Examine subijcit

NICOLAUS Mästner /

Ottohusan huringus,

*Ad diem*

*Ante horis & loco consuetis.*

---

ERFFURTI, Literis KIRSCHIANIS  
ANNO M. DC. LXXIX,



CELSISSIMO ATQUE ILLUSTRISSIMO  
COMITI AC DOMINO,

DN. LUDOVICO  
GUNTHERO,

E QVATUOR SACRI ROM. IMP  
COMITIBUS, COMITI DE SCHWARTZ-  
BURG ET HOHNSTEIN, DYNASTÆ ARNSTADII,  
SONDERSHUSÆ, LEUTENBERGÆ, LORÆ  
ET CLETTENBERGÆ,

DOMINO SUO CLEMENTISSIMO,


Inauguralem hanc Disputatio-  
nem Medicam

humilime offert

NICOLAUS ROSTNER



Σὺν τῷ Ἀρχιάτῳ Τεσσαγίῳ!



Uamvis universim verum sit Græcum  
ex Hippocratis, vel Democriti potius, dictamine  
(Epist. ad Damoget.) desumptum proverbium:  
Ὅλος ὁ ἄνθρωπος νόσος ἐστὶ: maximè omnium  
tamen, duplici veritatis jure, idipsum compe-  
tit in sequiorem sexum: utpote qui, præter  
communes, cum masculino, corporis afflicti-  
ones, priorum insuper, eorumque innume-  
rabiliū pænè, Morborum & Symptomatum, quibus exinde Mu-  
liebrium tribuitur cognomen, jugum sufferre cogitur.

Accedit, quòd nulli ferè morbi in omni Medica arte depre-  
henduntur implicati, difficiles & periculosi adeò, quàm illi ipsi:  
quod omnes veteres æquè ac recentiores, qui de morbis mu-  
lierum commentationis quid publicæ luci commiserunt, Autores  
attestantur: quos quidem universos ipse præit venerandus *Cous lib.*  
*de Natura Mulieris*, hinc 2. *de Morbis Mulierum*, & alibi. Cujus  
quidem rei causæ petuntur à constitutione teneriore, humidiorè, pu-  
lore insuper, quò sexus iste peculiare sibi morbosos affectus in-  
ducit perniciem justò diutiùs ferè celat: procul dubio tamen po-  
iores (causæ) consistunt in auctiore corporis ab utero apparatus  
atque onere, & hinc *Conceptionis & Gestationis*, itemque *pariendū*  
& *lactandi* munere. Quò etiam spectat irati Creatoris commina-  
tio *Genes. 3. v. 16.*

Facilè autem in omnibus istis malis primas tenent, quæ à Men-  
strui Sanguinis pernicioſa proclivitate in varias ἀνομίας & ἀταξίας  
proveniunt: quandoquidem totus pænè muliebris sanitatis car-  
do vertitur in Naturæ lege convenienti exuberantis sanguinis  
ad uterū motu & excernendi modo: adeò ut ubi is ritè se habet, illa  
(cæteris nempe paribus) optatò vigeat; concidat verò & sub-



vertatur, ubi secus : præsertim autem, ubi sanguinis ea vacuatio præternaturaliter deficit atque emanet, sive supprimitur, attestante *Roderic. à Castro lib. 1. de Mulier. Morbis c. 4. in marg.*

Ex quo etiam hunc ipsum emanentis, vel suppressi Menstrui fluxus affectum pro *Inauguralis Dissertationis* argumento seligere haud abs re visum est : sicut tamen, ut satis mihi sit, propositas *The- ses* meliorem in modum defendisse, & practico firmasse usu, licet cætera nec eloqvii gratiâ, nec elaborationis *ἀνεξβία* ullâ splendeant.

Te verò, *ter opt. max.* animi corporisque nostri *Archiater, æterne DEUS*, supplex veneror, velis quaecunque hoc meum institutum pro immensæ tuæ benignitatis ubertate felix & faustum reddere.

### §. I.

**U**T igitur *περὶ γυναικείας* ipsam nunc aggrediar, eamque expeditionis post progressus muniendi ergò à *Nominis* definitione ordiar ; ante omnia sanè de *μηνικῶς* appellatis hîc *Mensibus*, *Menstrua Purgatione*, vel *Evacuatione*, quam Græci *καταμύμια*, Germani *die Monatliche Zeit* &c. vocant, constare debet : quemadmodum nempe *DEUS* & *Natura* omninò voluerint, ut in seqviori sexu ab ineunte iusta pubertate ad quinquagesimum ferè annum uberioris sanguinis flos sensim ad uterum feratur : eò nempe, ut ibi collectus Generationis & Formationis opus adjuvet & promoveat, aut hòc deficiente (ex accidenti) singulis Mensibus per muliebrem sinum evacuetur.

### §. II.

Et licet hic fluxus, dum in juvenculis primùm erumpit, seriem singulorum mensium ad ungvem non observet, uti exempla & experientia clarum faciunt ; nonnullæ tertiò quoque mense solum purgentur ; successu tamen temporis sensim sensimque natura viis apertis assvefacta, & sanguinis copia aucta, hunc ordinem solet obtinere. Falsum itaque est, quod *Aristoteles 7. de histor. animal. 2.* scribit : paucis mulieribus singulis mensibus, pluribus autem intermissò unò mense Menstrua moveri. Nec frequens est exemplum, quod *Panarollus pent. 2. obs. 41.* de muliere adducit singulis mensibus bis menstruata.

### §. III.



### §. III.

Perstatq; omnino certum id, quod *Menses*, de quibus agimus, ab exactio singulorum mensium recurſu ita dici, sexui foemineo proprii ſint: (quod enim *Panarollus* de viro per penem ſanguinem excernente memorat, oppidò rarum eſt,) ordinariè circa ſeptenarium ſecundum; quo tempore & mares ſemen generant, generatumq; emittere inchoant, & uterque ſexuſ varias alterationes circa partes genitales percipit, fluendū initium capiant, huncq; periodicum fluxum uſque ad ſeptimum ſeptenarium continuant, ubi ſinis huic excretioni naturali imponitur. Si igitur *Menses* hi ſtatutum à Natura provida tempus non obſervant, poſſit licet omnibus requiſitis, & fluere non incipiunt; vel licet ſemel, bis, vel ter fluant, nihilominus tamen iterum per aliquot meſes, vel annos planè emanent, vel per totam vitam nunquam fluere initium faciunt, uti de viraginibus quibusdam notum eſt, in quibus ne veſtigium huius fluxus obſervatur, uno verbo affectus iſte eſt & vocatur *Emanſio*, vulgò *Suppreſſio Menſium* præternaturalis.

### §. IV.

Quæſtio hic *est*, *cur* *napòdes* non levis occurrit: quænam ſit cauſa, quòd hic fluxus tam exactam retineat periodum? Autores hic ſerram contentioniſ inter ſe reciprocant: plurimi eorum *Luna* partes eas deferunt; eò quòd pro diverſitate phaſium in mutandis & alterandis humani corporis humoribus multum valeat: qui pro ſtabilienda ſua hypotheſi *Hydropicos* adducunt, quorum aqua pro diverſitate phaſium *Æ* creſcit & decreſcit: ipſe & *Maris æſtus* à plerisque *Æ* viribus reſertur acceptus. Imò nonnulli tantum tribuunt *Æ*, ut in omnibus ſerè morbis phaſes *Lunæ* aſpiciunt: ſed non raro expectando feliciorẽ *Lunæ* aſpectum, patientem intereà mori ſinunt. Enimverò, eſſi *Æ* in mutandis humani corporis humoribus multum valeat, hoc tamen concedi minorẽ pot-eſt, eam eſſe adæquatam variantis admodum periodi huius cauſam; quandoquidem omnino peculiaris quoque ſubjecti cuiusque corporis & Naturæ diſpoſitio multum eò facit; quâ de re experientia teſtatur, propriaque mulierum confeſſio. Hinc quædam, in *Æ* incremento, quædam in decremento purgantur, utcumque, non omnino ſibi conſtet veritas verſiculi:

*Lu-*



*Luna vetus vetulas, juvenes nova Luna repurgat.*

Et ipse Philosophus 2. de generat. animal. 4. Non est, inquit, prescriptus huic fluxui certus terminus, ut qui nunc novâ, nunc plenâ, nunc decrepitâ Lunâ contingit. Unde patescit hanc sententiam lubrico stare talo, & debili admodum niti fundamentô. Regnerus de Graaf putat causam esse definitos Naturæ motus & certas illius leges, nobis adhuc incognitas : sed obscurum per æquè obscurum declarat.

§. V.

Sed enim ut, missis Physiologicis & generalibus istis, pro instituti ratione, de p. n. ingruente eoque omnimodò seu totali Mensium defectu dicam, qui vulgò Suppressionis nomine venit ; nec male ; dum vocabulum id habitum potius, quàm actum, vel actionem denotat, idque non citra morem verbalium in IO. Videtur autem hujus æquivocationis cavendæ ergo convenientius esse *Emanationis* nomen.

§. VI.

Emanatio autem Mensium dupliciter sumitur, *generaliter*, vel *specialiter* : generaliter pro quacunque mensium emanatione tam naturali, quàm præternaturali : illa est varia pro varietate causarum, v. g. ratione ætatis, si ante annum decimum quartum menses non fluunt, & post annum quadragessimum nonum iterum cessant. Ratione statûs mulierum, si sunt gravidæ, vel lactantes ; ratione defectûs materie, quod imprimis contingit, si laborant, vel brevi antè laborârunt morbo quodam graviore, dum reconvalescunt : tunc enim ad aliquot menses lunares hæ purgationes emanant ; aut si præcesserint aliæ extraordinariæ evacuationes, v. c. sanguis mediâtè, vel immediâtè invenerit effluxum. Verùm in his & similibus mensium emanationibus naturalibus Medici cura non desideratur.

§. VII.

Specialiter autem accipitur pro Emanatione Mensium præternaturali, in qua ætas quidem conveniens & justa, materiaq; præfens ; sed propter varia obstacula per loca ordinaria sanguis istam viam invenire non valet. Et hæc est, de qua jam loquimur.

§. VIII.

Ex hisce paucis luculenter patet, quòd Emanatio Mensium ista sit



fit *totalis menstrui sanguinis*, singulis mensibus ex lege naturæ aliàs semel fluentis, *præter naturam ablatio*, sive *detentio*; orta à vitio sanguinis, vel vasorum.

§. IX.

Definitur, *ablatio præternaturalis*, ceu symptoma abolitæ actionis, quò ipsò non omnem mensium emanationem, non eam certè, quæ in gravidis, vel lactantibus, aut post quinquagesimum annum naturaliter contingit; & quia totalis est ablatio, non confundenda est cum suppressione mensium specialiter dicta, ut quæ emanationis facit initium, fluxumque in media via impedit.

§. X.

Ulteriora Definitionis verba ex iis, quæ jam nunc pro Subjecti & Causarum notificatione sequuntur, plenius obtinent lumen, in qua primò *Subiectum*, seu *pars*, quæ in hoc affectu præ reliquis affici solet, est *duplex*: vel *inhesionis*, vel *antecedentis radicationis*; Illud iterùm est duplex, vel *massa sanguinea*, vel *vasa uterina*, præsertim *vaginæ*: Hoc verò, nempe *subiectum antecedentis radicationis*, est *stomachus & sanguificationis operantia viscera*.

§. XI.

Quoad primum *Inhesionis subiectum*, quod etiam *subiectum Passionis*, vel *Affectionis* vocatur, in propatulo est, excretionem menstrui sanguinis naturalem quoque (notanter dico, naturalem, quia omnes reliquæ sanguinis excretiones sunt præternaturales) non sine fermentatione & turgescenti fervore fieri, ex quo impetu sanguifera vasa uterina per ἀναστόμωσιν aperta, sanguini januas & fenestras aperiunt.

§. XII.

Fieri autem hanc sanguinis excretionem non sine sanguinis fermentatione aliqua, testatum faciunt non solum adjuncta & concomitantia, sed etiam iuvantia & nocentia. Illa sunt dolores lumbares, sensus tensionis circa regionem pubis, varix variis in locis pulsationes, imprimis in capite propter copiosas arterias; quæ omnia singularem sanguinis turgescentiā ostendunt: His accedit difficilis respiratio, quia motus sanguinis turgescens replet & distendit vasa pulmonaria. Hanc autem fermentationem promouent omnia acris volatilia vi fermentatiuâ prædita, v.g. cinamo-



*nam, zedoaria, artemisia, crocus, cuminum, &c.* quorum omnium  
consistit in eo, ut attenuando, aperiendo & fermentand  
moveant menses; quemadmodum ex adverso omnia acida, pri  
ribus contraria, horror subitaneus, frigus externum, sanguinem  
coagulando, fermentationem quæ ejus & turgescientiam inhiben  
do, Mensium fluxum sistunt.

Ex his dictis luce meridiana, sanguinem tunc esse  
subiectum causale, sive obiectum proximum & primum; si ejus  
massa est cruda, crassa & viscida, ad expeditum motum & ferment  
tationem inepta, & per vias secundum naturam minus patentem  
non facile transire valens; unde necessarium est, ut, nisi per alia  
loca extraordinaria exitum inveniat, sed retineatur, præternatu  
ralem hanc Mensium detentionem soleat causari.

#### §. XIV.

Quod alterum & magis propriè dictum in hæsiōis subiectum  
attinet, consistit id, uti supra dixi, in vasis uteri & vaginæ præ  
sertim, seu colli uteri obstructis, quæ in primis sunt rami inferior  
res arteriæ hypogastricæ, venis haud verò ipsius exclusis; Pri  
mò enim per Anatomen, alterum Medicinæ oculum, liquet, vas  
hypogastrica non ad ipsum uterum, sed ad cervicem ejus utri  
que deferri; uti in *Tabula XXVI. Anatom. Barthol.* videre est.

Deinde si menstruum hoc profluvium per ipsum uterum con  
tingeret, in gravidis etiam, in quibus interdum hæc excretio per  
totum gestationis tempus, absque tamen noxa, perdurat, id fie  
ret: videatur *Realdus Columbus in Anat. lib. 2.* Hoc autem con  
trarium esset hypothese magni Medicinæ Dictatoris *lib. 5. apb. 5.*  
quæ ventrem ferunt, iis os uteri connivet, adeò, ut ne specilli mu  
cronem admittat; si hoc verum, id quod plerique Anatomici con  
firmant, persuadere mihi haud possum, hunc sanguinis fluxum per  
uterum firmissimè sic clausum posse accidere. Accedit huc histo  
ria *Guillelmei in Tr. de partu felici c. 12.* de muliere, quæ octo die  
bus ante partum per aliquot dies quatuor, vel quinque pintas aqu  
rum evacuerit, non per uterum, sed per vasa vaginæ uteri. S  
prostant Observationes Autorum, quasdam mulieres hydropicæ utero  
labi



laborasse, & nihilominus tamen mensium fluxum esse passas: Jam  
verò si sanguis exitum per uterum invenire potuit, cur non etiam  
simul aqua? Tandem ipse *Galenus* jam dudum scripsit: In proflu-  
vio muliebri uterus non laborat. De qua quidem sententia pro  
& contra disputatur.

#### §. XV.

Adducunt quidem Autores, contrariam sententiam foventes,  
se vidisse mulieres uteri procidentia laborantes; quibus ex uteri  
osculo sanguis evidentissime promanaverit. Verum hæc obser-  
vatio magis pro stabilienda, quàm destruenda nostra sententia est.  
Nam in procidentia uteri, non ipse uterus, sed vagina uteri pro-  
labitur: id quod præcipui commatis Anatomici amplius confir-  
mant, & in his insignis *Amstelodamensis Chirurgus Van Meester*  
cap. 51. de muliere insigni putatâ procidentia uteri laborante, in  
qua tamen, apertò cadavere, autopsia aliud monstravit. Sunt et-  
iam nonnulli, qui fluxum hunc in gravidis negant & allegant  
*Aphor. 60. lib. 5. Impossibile est foetum agere vitam sanam, si mulierem*  
*gravidam purgationes exeant.* Sed enim intelligendus est *Aph.* iste  
de immoderatis mensium purgationibus; utut hic fluxus non tam  
per uterum, quàm per vasa vaginæ fiat: quia hoc modo foetus  
suo nutrimento nihilominus privatur, & necessario debilitatur.  
*Andr. Vesalius lib. 5. de corp. humani fabricat. c. 15. ex venis fun-*  
*di uteri, non cervicis menstruas purgationes evenire;* sed addit  
hæc verba: *Etiam si id sectione non deprehenderim.* Contrarius ve-  
rò est *Columbus lib. VII. Anat.* qui eligit vasa, quæ in cervicem  
ad latera inseruntur. *Rolfinck. autem diff. Anatom. method. synth.*  
*lib. 6. c. 28. media viâ vult incedere,* magis tamen videtur incli-  
nare ad cervicem, quàm ad uterum. Miror autem hac in parte  
*Grafium*, virum aliàs satis eruditum, qui expressis verbis negat  
hunc fluxum fieri per vaginam uteri, & tantummodò uterum e-  
ligere, cujus argumenta, brevitatis ergò, hæc vice adducere nolo.  
*Vid. cap. IX. de organis mulier.*

#### §. XVI.

Non immeritò autem hîc quæstio movetur, cur hæc excretio  
exitum quærat per vasa genitalia, non verò per alia loca? Ansam  
huic quæstioni excretiones factæ per vasa hæmorrhoidalia, per  
B narcs,



nares, per mammas, &c. dederunt. Huic quæstioni satisfacere videtur Galenus lib. 2. de semin. c. 5. Hæ, inqviens, partes omnium sunt imbecillime. An verò his verbis nostræ quæstioni satisfaciatur valdè dubito. Vera causa, finalis scil. in superioribus habetur exposita: voluit nempe Natura benigna, ut sanguis per hunc fluxum viis istis asvescat, quò minùs tempore gestationis foetui sufficiens denegetur nutrimentum.

§. XVII.

De his subjectis inhætionis magnum adhuc restat dubium, quomodo Medicus certus esse possit, quodnam subjectum magis sit affectum, an massa sanguinea, an vasa uterina? In hoc enim puncto cardo totius curæ vertitur. Huic dubio hoc modo satisfieri puto, observando, an virgines, vel mulieres, statutis à natura sapienti temporibus, percipiant pathemata, quæ ostendunt sanguinis impetum vergere ad vasa uterina, an non? exempli gratiâ, si percipiunt dolores lumbares circa vasa lumbaria, gravitatem totius corporis, inflationem ventris, cibi fastidium, crebras vicissitudines caloris & frigoris, respirationem anhelosam; sensus tensionis circa genitalia & regionem pubis, pulsationes in variis corporis locis, in hypochondriis, in artubus, murmura & borborygnos in abdomine; sanguinis impetus per alias vias inordinarias; hæc & similia manifestum reddunt vasa partium genitalium esse affecta atque obstructa. Sanguinis verò vitio hoc contingit, quando virgines & mulieres nullas alterationes, nullam tensionis, vel pulsationis sensum circa genitalia & lumbos tempore à natura ordinatò, vel alia pathemata, in vasis partium genitalium denotata, percipere solent.

§. XVIII.

Subjectum radicationis, à nonnullis subjectum causale & generationis remotius appellatum, quod spectat, stomachum & viscera sangvificationi destinata, non sine fundamento, suprâ agnovi. Notum enim est, plurimorum, imò ferè omnium morborum fomitem hæere in stomacho, unde non mirum, si & in hoc affectu prima origo ex stomacho ferè accersitur. Vulgarissima enim est regula in arte Medica: Qualis chylus, talis sanguis. Fundamentum namque vitalitatis in sanguine, fundamentum vero  
fani



sanitatis in chylo, seu stomacho, consistit. Unde si convenientia  
alimenta assumuntur, assumpta legitimo modo fermentantur &  
concoquuntur, sequitur laudabilis chylus; sin contrarium con-  
tingit, necessario stomachus copiosis cruditatibus, recremento-  
sis, viscidis & pituitosis refertur, unde robur ejus digestivum  
a nimia partim copia obruitur, partim tenaci visciditate hebeta-  
tur, quominus cruditates hasce digerere, aut desuper ingesta  
alimenta ritè fermentando concoquere possit; unde sumè neces-  
sariam pro universa corporis œconomia negotium, digestio nem-  
pe, turbari solet. Quid igitur mirum, si errata digestionis primæ  
nulla alia corrigi queant, sed alimenta semidigesta, nec ritè  
in primis viis per fœcum debitam separationem perfecta, ad san-  
guinem distribuuntur, unde sanguini non debite assimilata mas-  
sam sanguineam reddunt crassam & viscidam, hinc vitalis ejus  
agitatio, & per consequens hic fluxus, manifestè impeditur.

#### §. XIX.

Nec puto ullum fore, qui miretur, nos posuisse stomachum  
anquam primordiale subiectum hujus affectus, si æqua saltem a-  
nimi lance symptomata circa stomachum obvia perpenderit;   
Nam hujusmodi patientes insignes præcordiorum angustias &  
anxietates, stomachi inflationem, murmura & borborygmos pa-  
iuntur, quæ in primis augeri solent, si alimenta ab ipsis viscida  
sumuntur, qualia sunt lac & lactinia, caseus, panis recens &c.  
ex quibus omnibus manifestum fiet, partem affectam esse stoma-  
chum. Hisce dictis superpondii locò accedunt juvantia: quia  
plurimum in hoc affectu ab evacuando & corrigendo stoma-  
cho curam auspicari decet.

#### §. XX.

Non me quidem fugit esse nonnullos, qui ad subiectum radi-  
cationis referunt nunc epar, nunc lienem, nunc renes; sed vercor,  
ut hæc sententia locum invenire possit, nisi præviò vitiò stomachi:  
quia erratum primæ concoctionis non corrigitur in secunda, &  
cum est potius productum, quàm causa morbi. Hæc de Subiecto  
& parte affecta dicta sunt.

#### §. XXI.

Accedo nunc ad Causas penitiùs explicandas; quia cognita  
B 2 & remo-



& remotâ causâ, ipse affectus cognoscitur & removetur. Hæc pro diversitate subiecti sunt diversæ. Libet nunc eas distingvere in *proximas & remotas*: Illæ ratione duplicis subiecti sunt duplices. Prima ratione sanguinis est nimia crassities, & glutinosa visciditas, quæ crasin massæ sanguineæ volatilem inveniit, fluxilitatem & fermentationem ejus impedit, adque motum ineptam reddit, spirituum vitalium & animalium generationem inhibet, quorû alioqui virtute omnis naturalis excretio promovetur.

§. XXII.

Positô autem massam sanguineam in crasi sua & qualitate se optime habere; attamen si vasa, per quæ hic fluxus menstruus exitum habeat, minus sint aperta, sed obstructa, impedimento huic fluxui sunt, quò minus foras prodire valeat.

§. XXIII.

Est autem vasorum ista indispositio duplex; nempe vel à primo ortu, vel tractu temporis oborta; Illa est, quando natura hæcce vasa reddit nimis angusta in prima generatione, adeo ut sanguis, licet conetur, per eorum exilitatem permeare & egredi non valeat; unde per alia sibi convenientiora exitum querit, v. g. per vasa hæmorrhoidalia, quæ cum uterinis eundem agnoscunt truncum; hinc fluxum hæmorrhoidalium in subiectis fœminis alias rarum constituunt; sic quandoque per nares, per lacrymas, per dentis alveum, per vomitum, per minimum digitum, per spatium illud, quod mammæ dividit, sanguis ille prodit. Tractu verò temporis hæc vasorum obstructio fit à materia quadam viscida, glutinosa & mucilaginosa, quæ sensim sensimque hæc vasa genitalia obstruit, fluxumque istum impedit.

§. XXIV.

Absolutâ causâ proximâ, ad alterum Causarum genus, naturæ opus alias benignum difficile reddentium, jam accedamus, ubi primum locum obtinet stomachus: hic enim quantum in hoc affectu valeat, ex supra dictis satis superque patet. Nam si hic in robore suo & cœctione destituitur, & alimenta assumpta non rite concoquit, nec chylum laudabilem efficit, pressio pede sequitur sanguis crassus, viscidus & pituitosus: Quale enim fundamentum, tale superstruitur ædificium.

§. XXV.



§. XXV.

Huc referuntur omnes ejusmodi causæ, seu res non naturales diætæ, quæ corpus nostrum de statu naturali in morbos possunt dejicere; in quibus agmen ducit in vitium ratione peccandi licentia, quâ stomachus aliàs firmus debilis redditur, vel jam labefactus planè pessundatur.

§. XXVI.

Committitur autem peccatum in vitio, quando alimenta assumuntur vel in quantitate, vel in qualitate peccantia. Quod quantitatem attinet, notum est, quod luxuria vulgò vocetur Medicorum nutrix, & quod gula plures necet, quàm ensis; id quod verum esse, ipse Medicorum Princeps autumat: qui parum, inquiens, edit & potat, is parum & rarò quoque laborat ægrotatque. Nam licet vis fermentandi & digerendi stomachalis sit summa, tamen in efficacia sua, propter copiam & varietatem alimentorum impeditur, quò minùs spicula sua in ea exerere possit. Ex Chymia enim novimus, quòd inter menstruum solvens & rem solvendam, certa requiratur proportio, quod etiam hîc omninò observandum venit. Si contrarium sit, alimenta non ritè fermentata & digesta, sed semicocta abeunt in pastam tenacem, crudam, viscidam & pituitosam, quæ ad massam sanguineam delata, eam necessario solent corrumpere & perturbare.

§. XXVII.

Quod alimentorum *qualitatem* concernit, experientiâ compertum habemus, nil magis nocere mulieribus, etiam iis, quibus ordinariè solent fluere menses, quàm copiosius assumpta acida; hinc viscida, glutinosa, pingua, dura, nimis salita & fumo indurata, quibus omnibus ventriculus oneratur, tonus prædictaq; virtus ejus pervertitur atque obtunditur, quò minùs incibum agere, debitoque modo illum perficere possit; hinc ventriculi œconomia turbatur, sanguisque vitiosus generatur.

§. XXVIII.

Aërem frigidum non ima hîc occupare subscellia, ostendunt mulieres, quibus actu fluunt menses; si nudis pedibus in pavimento incedant, vel in aqua frigida manus, vel pedes lavent, aut si ex improviso frigus externū partibus genitalibus excipiant; suppressionem mensium non rarò hinc incurrentes.

§. XXIX.



nissimus est cachexia, quæ à quibusdam istius mali causa habetur, sed potius effectus est, quàm causa. *Zac. Lusit. l. 2. pr. admir. obs. 95.* Apoplexiam observavit. *Hercul. Saxon. pr. medic. l. 1. c. X.* duas virgines moniales in cœnobio post mensium suppressionem paralyti correptas scribit. *Platerus l. 1. c. 3. prax.* de nobili matrona, alioquin honestissima, refert, quòd propter seminis & mensium retentionem tanto furore fuerit correpta, ut tam homines, quàm canes ad congressum verbis gestibusque turpissimis invitare non erubuerit. *Hippocrates l. 6. apb. 29.* mulier podagra non laborat, nisi menstrua defecerint. Alii observarunt epilepsiam, vertiginem, sterilitatem, cephalalgiam palpitationem cordis, pleuropneumoniam, picam, dysenteriam, hydropem, &c. In virginibus ut plurimum febrem albam efficit. Morbos verò chronicos alios reddit graviores, adeò ut non curari possint, nisi menses fluant.

#### §. XXXVII.

In §. 35. dixi, quòd Emanatio mensium ut plurimum sit malum chronicum, quod verum est. Nam rectè *Sylvio lib. 3. pr. p. 610.* monente, in hoc affectu lentè est festinandum, & plus perficitur blandis, quàm vehementibus medicamentis, unde ægræ propter continuationem remediorum nausea corripuntur, & ipsam curationem negligere solent.

#### §. XXXVIII.

Vilo & consideratò genere, Subiecto, Causis, Signis tam diagnosticis, quàm prognosticis, ordo nunc poscit, ut ad ipsam Curationem accedam. Ea autem suis circumscribitur Indicationibus, sive scopis, ceu medendi methodo: unde cum primis requiritur hîc, ut (1.) ventriculus, siquidem in eo & primis viis deprehendatur primarius mali fons consistere, emendetur, ejusque chylicatio rectificetur. (2.) Massa sanguinea, ejusque cruditas & crassities corrigatur. Simul atque (3.) angustia & obstructio vasorum removeatur humorum visciditatem, vasa obstructentem resolvendo & incidendo. (4.) Hisce tandem adjungantur appropriata, seu menses scientia & expedientia: Remediorum materiam desumendo ex fonte 1. Pharmaceutico. 2. Chirurgico. 3. Dietetico.

#### §. XXXIX.



### §. XXXIX.

Primo scopo ut satisfaciamus, opus est, ut stomachus, ubi cruditatibus acidis, humoribus viscidis & pituitosis laborat, iisdem quantocyus liberetur: adhibendo ea, quæ eundem evacuant, & unô quasi impetu ab hac humorum sarcina liberum reddunt.

### §. XL.

Sunt autem duo ferè ejusmodi impedimenta, quæ removeri debent: alterum est humoris, v. c. Melancholici, ut vocant, vel Pituitæ, acrimonia acida, quæ à medicamento purgante interdum quidem movetur, sed, motâ camarinâ, rodit, vellicat, & nonnunquam excoriat intestina, ut tormina atrocia & fluxus cruentus superveniat. Alterum obstaculum est succorum per purgationem evacuandorum nimia visciditas & glutinositas, ratione cujus medicamentum energiam suam exerere haud potest, sed in operatione sua impeditur, obtunditur & hebetatur; quia humores minùs sunt mobiles, nisi priùs resolvantur, und bleibet die Purgation sitzen/ uti Germani loqui amant.

### §. XLI.

Ratione prioris dati obstaculi conveniunt martialia, quædam terrea ac marina, & in his corallia, mater perlarum, oculi cancrorum &c. confer Nob. *Exp. Experientis. D. Ludov. in Diss. 1. Pharmac. pag. 161.* & omnia reliqua vi acidum absorbente pollentia; hóc enim absorptô & in sal tertium mutatô, perque vias urinarias, vel alias evacuatô, medicamentum purgans exhibitum scopum suum absque ullo negotio assequi potest.

### §. XLII.

Deinde pro resolvenda humorum visciditate conveniunt remedia salina, tam fixâ, quàm volatilia, quæ eandem incidunt, & glutinositatem attenuant; quibus remotis, medicamentum evacuans laudabilem dabit effectum; reliquis verò, magis nocet, quàm juvabit.

### §. XLIII.

Cùm autem in nostro affectu hæc duo impedimenta haud raro simul occurrant, non inconsultum erit, hæc duo remediorum genera conjungere, ut unâ quasi falce ea resecentur. Interim ordine progrediar, & pro uno quolibet unum, vel alterum dabo exemplum.

C

### §. XLIV.



#### §. XLIV.

Pro primo scopo primum locum obtinent martialia, vel in forma liquida, vel sicca usurpanda: v. g. Recipe eff. l. extr. mart. unc. β. & de hac omni mane & vespere in conveniente vehiculo assume guttas XXX. ad XL. In forma sicca usurpatur mars præparatus, crocus martis vulgò aperitivus, rectius alterativus, digestus, qui cum aliis conjungi potest, v. g.

℞. Corall. rubr. præparat. Ocul. cancror. præparat. ana scrup. β.

Croc. mart. aperient. gr. iij. M. F. P. S. Digestiv-Pulver.  
Detur in duplo, manè & vespere ante cœnam exhibendus.

#### §. XLV.

Ut autem humorum visciditas & glutinositas incidatur & resolvatur,

℞. Tartar. Vitriol. drachm. β. Salis matric. gr. xvi. M. F. Pulv.  
in duas partes æquales dividendus, S. Erweichendes Pulver.

#### §. XLVI.

Tertius præscribendi remedia digestiva modus hîc optimus est, & tutissimus, quia mediante hoc, duo quasi parietes unâ fidelitâ dealbari queunt; hinc talis Pulvis ordinari potest;

℞. Lapid. cancror. Vel matr. perl. præparat. drachm. β. Arcan. dupl. Myns. scrup. i. Sal absynt. scrup. β. M. F. Pulvis.  
Dividatur in duas partes æquales. S. Digestiv-Pulver.

#### §. XLVII.

Hisce præmissis, tutò ad ea, quæ stomachum evacuant, accedimus: inter quæ omnium optima sunt vomitoria, quæ stomachum evacuant, & à cruditatibus liberant; unde unum vomitorium plus præstat, quàm aliquot purgationes per inferiora: pro quo scopo sequentibus utamur licet formulis:

In forma liquida:

℞. Aqu. menth. unc. β. Syr. emetic. rub. idæ drachm. i. S. Nicot. qui optime resolvit, drachm. ij. M. F. Potio. S. Brech. Trauc auf elumabt.

In forma pulveris:

℞. Tartar. emet. Myns. gr. iv. Sacchar. albissim. gr. viij.  
M. F. Pulvis. S. Brech. Pulver.

#### §. XLVIII.



§. XLVIII.

Habent omnino Vomitoria suum hîc locum; quia mirum sæpe in modum affectum nostrum pro dato casu levant. Unde non imè-ritò miror *Barbettum*, qui in *Pr. suac. de suppr. mens.* hæc improbat, & magis probat purgantia; & videtur hanc sententiam ex *Aphor. 36. lib. 5.* hausisse: ubi Hippocrates, *Mulieri, ait, menses decolores, nec eodem semper modo & tempore prodeuntes, purgationem indicant esse necessariam.*

§. XLIX.

Qui ergo hanc evacuandi rationem illi præferunt, & latentes in stomacho sordes per alvum educere malunt, variò Purgantium apparatu, pro ægrotantium & vitiosi humoris diversitate, uti frui possunt. Non est autem, ut proluxior sim in præscribendis formulis: ut quæ perquam notæ sunt; inque omnium Prædicorum commentariis ubertim se offerunt: exempli interim causâ è Pilularum genere subsequentes commendo; quia pilulæ optimè ab ægrotis deglutiuntur.

§. L.

In harum verò ingredientibus eminent Mercur. dulc. & hellebor. niger, ille in morbis chronicis, cœu catholicum pænè purgans; hic verò non solum propter vim purgandi, sed etiam propter vim alterativam & correctivam laudatur. Pollet enim singulari sale volatili, & quidem adeò volatili, ut in cineribus ejus parum salis reperiatur. Hinc *Angel. Sala in Anatom. essent. vegetab.* miris modis in hoc affectu commendat pessor ex helleboro nigro factos. Optimus ergo utendi modus est in forma pilulari, v. g.

℞. *Extr. hellebor. nigri gr. xv. Merc. dulc. gr. xii. Extr. troch. alband. gr. ij. Cum s. q. ess. myrrh. F. Pilul. pro una dosi.*

Alii faciunt nodulum laxantem & alterantem ex radice hellebori nigri & senna cum aromaticis, qui vino infunditur, & modo usitato usurpatur. Hæc de prima indicatione.

§. LI.

Correctis primis viis, sanguinis cruditas acida & crassities corrigatur: quod faciunt omnia aromatica, *salvia, ros marinus, mentha, cinamom. zinziber, galang. zedoar.* & omnia amara, *absynth. cent. minus, cichorium, taraxacum* &c. imprimis autem spiritus volati-



latiles v. g. spir. sal. armon. essentificatus, liquor C. C. succinatus, ess. myrrh. castorii, elixyr proprietatis cum alkali, & imprimis volatili, quod singulare est. Hæc & similia variis modis, pro desiderio patientis, dispensari possunt: v. g. in forma vini medicati:

℞. Rad. belen. fœnic. armorac. ana unc. β. b. salv. menth. crisp. melliss. artem. rubr. ana m. β. fl. roris marini, cent. minor. bellid. ana p. i. sem. anisi, levistic. nasturt. ana drachm. ii. ꝯ diaphor. scrup. i. cum dimid. Cinam. scrup. ii. Macer. scrup. i.

Concisa & contusa includantur sacco, cui in cantharo lapideo affunde vinum libr. i. & dimid. vel pro libitu plus minusve, stent in cella per noctem, bibat ægra manè, in prandio ac cœna, vel paulò antè, bonum haustum, & quamdiu aliqua vis infusorum superat, novum vinum affundi potest.

Vel fiat Potio cum spiritibus volatilibus v. g.

℞. Aqu. scabios. puleg. ana unc. β. spirituos. cinamom. drachm. iii. spir. C. C. essent. drachm. i. syr. artem. drachm. iii. M. F. Potio. S. Alterier und Schweistreibender Trancf.

Vel in forma Pulveris:

℞. Antimon. diaph. gr. xvi. Sal. vol. succ. scrup. β. rotul. Christ. perlatar. num. iv. M. F. Pulvis. D. S. Schweiß Pulver.

### §. LIII.

In Tertia indicatione, si hæc obstructio à materia viscida originem sumit, (naturalis enim est incurabilis,) conveniunt pro scopo interno eadem, quæ in secunda indicatione laudabantur, nempe aromatica salina volatilia, materiam viscidam, tenacem & vasa obstruentem, resolventia & attenuantia, ipsumque sanguinem volatiliorem & penetrantiorum reddentia, adeo, ut hic tertius scopus faciliè cum secundo, quod interna remedia concernit, conjungi possit.

### §. LIV.

Hisce internis externa adnota non sine singulari effectu extolluntur, (vasu ipsius Hippocr. 5. Aph. 28. suffitus aromatum, muliebria educit; vasorum enim extrema conniventia recludit, humores crassos extenuat, & obstructions incidendo liberat, uti Galenus in Comment. Hippoc. addit. Hi suffitus variis modis & variis remediis instituuntur, v. g. ex sabina, colocynthide, myrrha, styrace &c.

℞. Sa-



*℞. Sabin. m. ss. myrrh. drachm. ii. Asphalt. drachm. i. Troch. alband. drachm. i. F. Pulvis.*

Qui injiciatur carbonibus, & suffitus per infundibulum excipiat utero. Alii recipiunt scorias regul. Antimonii, uti *Hartm. in Pr. Chymiatr.* coqvunt in aqua simplici, de hoc decocto aliquot cochlearia affundunt lateri calcfacto, vel silicibus ignitis, ut uterus dilatatus cruribus hauriat fumum; id quod etiam de urina foetida dicendum.

§. LV.

Non immeritò etiam laudatur instrumentum Glauberianum, qui mediante spongiâ salia volatilia, imprimis autem Sal ammoniacum alcalisato alicui junctum, utero aegræ conjugatæ immittunt. Qui verò hoc instrumento carent, phiolam recipere possunt, cui infundant aliquid de spiritu quodam volatili, e. g. spir. sal. armon. & ore phiolæ linteis circumducto, sinui pudoris admove; corpus verò phiolæ imponatur carbonibus, quo facto, sp. volatilis ascendit, vasis uterinis se insinuat, insinuandoq; mucum viscidum & glutinosum resolvit. Hic modus est egregius, & cultum habet in recessu.

§. LVI.

Ultima demùm indicatio specifica & appropriata desiderat, ut peculiari efficacîâ sanguini concilient motum, & ad uterum educunt.

§. LVII.

In genere conveniunt omnia Salia tam fixa, quàm volatilia, ubi amen hæc cautela observanda venit, ut salia volatilia tempore, quo menses fluere debent; fixa verò, è plantis præsertim appropriatis, antea adhibeantur.

§. LVIII.

Inter specifica utramque paginam faciunt *artemisia, pulegium, Cheir. rad. aristol. rotund. cinamom. myrrh. troch. de myrrh.* (quos alidè commendat *Rhases*,) *castor. crocus*; commune quidem, sed potens remedium, quò etiam vescuntur mulieres, dum actu fluunt menses; huic succedit *borrax*, singulare sal & potentissimum mensem stimulans, cum croco vegetabili, vel cinamomo & similibus aromatis mistus: verbi gratiâ



*℞. Borrax. scrup. i. cinamom. pulveris. scrup. β. M. F. Pulvis.*  
Sabinam, tanquam singulare & inprimis ejus oleum, omnes fere  
Practici laudant, unde etiam *Myns.* habet suas pilulas contra men-  
sium obstructionem ex sabina paratas. Et verò a<sup>l</sup> attestante expe-  
rientiâ petitum argumentum plus satis, proh dolor! indices confir-  
mant meretriculæ quædam, virgines videri volentes, dum uno ma-  
ximè sabinæ remedio, identidem commoto sanguine, adversus ra-  
dices agentem conceptionem se muniunt. Hinc calculum nostrum  
vix meretur hîc *Experient. Ludov.* quando in *Dissert. 1. Pharmac.*  
sabinam hæc in parte parùm æstimat, ut quæ parùm, nisi aliis ad-  
dita, præstet. Verùm quilibet abundet suo sensu.

§. LIX.

Hoc quidem non negandum est, quòd nullum sit remedii ge-  
nus, quod eandem habet vim in singulis, nec ullus morbus idem  
omnibus: unde nisi in omnibus remediis accommodata vis observetur,  
& subjectum patiens cum subjecto agente conferatur, non obtine-  
bimus semper optatum finem. Hinc natum proverbium Germa-  
nicum: *Es ist nicht eine Natur/ wie die ander*; quod verissimum  
est. Contra hoc quotidie peccatur; imprimis à vetulis & ejusdem  
farinæ hominibus, qui ultra crepidam sapiunt, & Medicinam præ-  
se ferunt, de qua tamen ne gry nôrunt, dicentes: *Das hat meinen  
Manne/ oder meinem Kinde geholfen/ das wird auch eurem helfen.*  
quod falsissimum: id quod plures cum summo suo damno & vita  
periculo experiuntur: cum si vel maximè medicastriis empiricis  
suppetant specifica quædam experimenta, persæpè tamen gladius  
sunt in manu furiosi: cum nesciant medendi methodum, atque  
adeò quibus, quando & quoties, quâ dosi, quibus additis, seu ad-  
emptis, cujusque ægrotantis constitutioni convenient: quibus  
tamen sæpenumerò non solum plebs, sed grandes etiam plus tri-  
buunt, quam experientissimis Medicinæ Doctoribus, adeò, ut  
parùm desit, quin nostro seculo verificetur illud Zachariæ: Medicus  
& obstetrix sunt ejusdem dignitatis. Sed patientia.

§. LIX.

Sunt, qui veterum ex commendatione, extractis & essentis  
plenibus v. g. bovis, cervi, &c. paratis multum hîc tribuunt: for-  
tea



rean respiciendo ad analogiam humoris melancholici &c. Quicquid verò hujus sit, res omnis sita est penes vivo opere confirmatam experientiam; de qua tamen metuo, ne sibi omninò constet; perinde ut de *liene asininò* in obstructione splenis calidi applicato; item de pellicula interiori stomachi gallinæ, & quidem, ut muliercularum opinio est, nigræ, in affectibus stomachicis; it. de felle catuli nigri in epilepsia infantum.

#### §. LX.

Dubio autem procul potioris momenti ac usûs sunt, quæ ex Hermeticorum depromuntur officinis, v. g. spiritus, Salia, Olea, Tincturæ, extracta Martialia, quæ ambidextra, seu ferè utriusque usûs, sunt, *cientia & supprimentia*; quò etiam refero elixyr uterinum *Excellentiss. Dn. Mæbii*. Et hæc de fonte Pharmaceutico sufficiant.

#### §. LXI.

E fonte Chirurgico imprimis commendatur, plurimoque in usu est, V. S. saphenæ imprimis, idve genus alia. Et quidem pro circumstantiarum ratione iterata: Ut quæ interdum miraculi instar levamen affert, & *Galeno 13. Method. medend. c. 31.* sacræ anchoræ instar est. E recentioribus nonnulli secus sentiunt, utpote quòd V.S. non conveniat, nisi plethoricis, & quidem in cute facta, dum si in pede adhibeatur, copiosus sanguis majori impetu ad vasa uterina rapiatur & obstructionem augeat. Ita *Amat. usit. C. 6. obs. 28.* refert de muliere, difficultate mensiû laborante, à qua quoties secta fuit vena in pede, toties sanguis prodire cessavit, in brachio verò, fluxit. Verùm *Excellentiss. Dn. Preses* haud absens censet, non in solis plethoricis Venæ sectionem hîc ex usu esse, utcumque his initiò conveniat superior illa, nihilominus potest & inferior: uti quidem in non plethoricis sola hæc atque ab initiò convenit. Interim utramque V. S. ad sanguinis ventilationem & liberiores motum facere.

#### §. LXII.

Supereſt, ut quoad tertium, *Dieteticum* nempe fontem, ad accuratum ventriculi munus, à quo institutum hoc cœpi, revertar. Quod nempe demum ritè & feliciter succedit curatio, si prædictorum



Horum legitimo usui accedat conveniens Diæta, h. e. sex rerum  
non naturalium regimen.

§. LXIV.

Cibus igitur non sit multiplex, nec multus, multò minùs vi-  
scidus, glutinosus, flatulentus, vel acidus, sed εὐχυμὸς καὶ εὐπεπτός  
& probè aromatibus conditus; hæc enim omnia obstructionem  
deobstruunt, & menses provocant; panis sit probè fermentatus,  
minimeque tamen cerevisiæ ex fæcibus.

§. LXV.

Cum motus corporis sit veluti medicus omniũ morborũ chro-  
nicorum, tam præservationis, quàm curationis quoad scopum  
haud dubiè hîc vita sedentaria, nimia quies & somnus protracti-  
or multum nocebit.

§. LXVI.

Cane verò pejus & angve vehementiora animi pathemata  
fugiat talis ægrota, quia experientiâ constat ejusmodi animi af-  
fectus, mulieres in hunc morbum statim præcipitasse.

§. LXVII.

Nec negligenda est consideratio excretorum & retentorum,  
quia alvus in hoc affectu semper aperta servanda est, aliàs affli-  
ctam magis affligere & mirè aggravare assolet.

§. LXVIII.

Hæc pro ingenii modulo de hoc affectu proponere in ani-  
mum induxi. Esto autem quædam prætermisisse, vel minùs ac-  
curatè in medium protulisse: Disputationis tamen ferien-  
do scopo ea, quæ proposui, abundè suffi-  
cere arbitror.

Τῷ ΘΕῷ Ἀρχιτέρῳ Τετραγύῳ  
Δόξα.